

Saranan hukuman berat jika terbabit bahan lucah

UM 16 JUL 2001

KUALA LUMPUR 15 Julai

— Persatuan-persatuan pengguna hari ini meminta kerajaan mengenakan hukuman lebih tegas termasuk penjara mandatori dan sebat ke atas mereka yang terbabit mencetak, mengedar dan menjual bahan berunsur lucah.

Setiausaha Agung Persatuan Pengguna Islam Malaysia (PPIM), Datuk Dr. Maamor Osman berkata, denda tinggi yang dikenakan sekarang, tidak berkesan dan langsung tidak mampu menginsafkan golongan ini.

“Bahan-bahan ini selain meruntuhkan moral juga telah memberi kesan negatif jangka panjang kepada masyarakat terutama ge-

nerasi muda. Bahkan ia telah memberi fantasi yang luar biasa kepada peminat bahan ini sehingga mereka mudah terdorong untuk melakukan hubungan seks rambang dan perbuatan meliwat,” katanya kepada *Utusan* hari ini.

Semalam, Perdana Menteri, Datuk Seri Dr. Mahathir Mohamad melahirkan kebimbangannya terhadap bahan-bahan lucah yang berleluasa diedarkan kepada umum termasuk ke peringkat kanak-kanak tadika.

Menurut Dr. Mahathir, beliau terkejut dengan fenomena itu kerana maklumat tersebut diperoleh daripada cucu beliau sendiri yang menceritakan apa yang dilihatnya.

Mengulas lanjut, Dr. Maamor berkata, PPIM melihat penjualan bahan-bahan lucah semakin berleluasa seolah-olah anggota penguat kuasa tidak berminat untuk menanganinya secara serius.

“Kita turut kecewa kerana bahan tidak bermoral ini sudah boleh sampai ke tadika dengan senang. Bukankah ini bermakna tahap penguatkuasaan kita terlalu lemah,” katanya.

Presiden Gabungan Persatuan Pengguna Malaysia (FOMCA), Prof. Dr. Hamdan Adnan pula berpendapat, kelemahan penguatkuasaan antara punca utama penjualan bahan pornografi sukar dibendung.

Hamdan memberitahu,

kesan daripada kelemahan agensi penguat kuasa telah menyebabkan rakyat semakin tidak kisah dengan penjualan bahan itu.

Malah, katanya, apa yang lebih membingungkan rakyat ialah bahan lucah bebas dijual di mana-mana sahaja termasuk pasar malam yang menjadi tumpuan orang ramai.

Dalam pada itu, beliau turut menggesa kerajaan mengenakan tindakan terhadap pengguna yang membeli bahan lucah.

“Bagi saya pengguna juga mesti dihukum sama seperti pengedar dan penjual. Mereka turut bersalah kerana membeli bahan yang diharamkan oleh kerajaan,” katanya.